

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine, na 85. sjednici Predstavničkog doma, održanoj 18. septembra 2006. odine, i na 5. sjednici Doma naroda, održanoj 22. maja 2007. godine, usvojila je

ZAKON

O IZMJENAMA I DOPUNAMA ZAKONA O OSNOVIMA BEZBJEDNOSTI SAOBRAĆAJA NA PUTEVIMA U BOSNI I HERCEGOVINI

Član 1.

(1) U Zakonu o osnovima bezbjednosti saobraćaja na putevima u Bosni i Hercegovini ("Službeni glasnik BiH", broj 6/06) u članu 186. iza stava (4) dodaje se novi stav (5), koji glasi:

"(5) Vozačka dozvola neće se izdati niti produžiti njen rok važenja licu koje ima neplaćenu novčanu kaznu ili troškove prekršajnog postupka ili druge obaveze evidentirane u Registru novčanih kazni u skladu sa važećim zakonima o prekršajima u BiH."

(2) Dosadašnji stavovi od (5) do (10) postaju stavovi od (6) do (11).

Član 2.

(1) U članu 208. iza stava (1) dodaje se novi stav (2) koji glasi:

"2) Ne može se registrovati vozilo niti produžiti rok važeća registracije vozila čiji vlasnik ima neplaćenu novčanu kaznu ili troškove prekršajnog postupka ili druge obaveze evidentirane u Registru novčanih kazni u skladu sa važećim zakonima o prekršajima u BiH."

(2) Dosadašnji stavovi od (2) do (5) postaju stavovi od (3) do (6).

Član 3.

(1) U članu 225. stav (1) riječi: "pravosnažnom sudskom odlukom" zamjenjuju se riječima: "prekršajnim nalogom odnosno sudskim rješenjem".

(2) U članu 225. stav (3) riječi: "sudske odluke" zamjenjuju se riječima: "konačnog i izvršnog prekršajnog naloga odnosno pravosnažnog sudskog rješenja".

Član 4.

(1) U članu 235. stav (1) iza tačke 33) dodaje se nova tačka 34), koja glasi:

"34) vozač koji se ne odazove pozivu nadležnog organa iz člana 222. osnovnog zakona radi dostavljanja vozačke dozvole s ciljem izvršenja zaštitne mjere zabrane upravljanja motornim vozilima."

(2) Dosadašnja tačka 34) postaje tačka 35).

Član 5.

Član 242. mijenja se i glasi:

"Član 242.

Izdavanje prekršajnog naloga obavlja ovlašćeno lice nadležnog organa za poslove kontrole i regulisanja saobraćaja na putevima u entitetima, kantonima i Brčko Distriktu Bosne i Hercegovine."

Član 6.

U članu 245. stav (1) mijenja se i glasi:

"(1) Trajanje zaštitne mjere zabrane upravljanja motornim vozilom računa se od dana deponovanja vozačke dozvole u skladu sa članom 222."

Član 7.

(1) Ovaj Zakon stupa na snagu osmog dana od dana objavljivanja u "Službenom glasniku BiH", a primjenjivaće se danom početka primjene Zakona o prekršajima.

(2) Ovaj Zakon biće objavljen u službenim glasilima entiteta i Brčko Distrikta Bosne i Hercegovine.

PSBiH broj 57/07
22. maja 2007. godine
Sarajevo